

摘藻堂四庫全書薈要

史部

欽定四庫全書薈要

史部

通志卷一百六十五

詳校官員外郎臣楊世綸



欽定四庫全書薈要卷九十八十三

史部

通志卷一百六十五

宋右迪功郎鄭樵漁仲撰

戚傳第一



羊琇

王恂

弟虔

楊文宗

羊元之

虞豫

子虔

琛

杜乂

褚裒

何準

子澄

王濛

子脩

王遐

王蘊

褚爽

後魏

賀訥

姚黃眉

杜超

賀迷

閻毗

馮熙

子誕

李惠

高肇

胡國珍

從曾孫長祭

楊騰

乙弗繪

北齊

趙猛

胡長仁

隋

高祖外家呂氏

獨孤羅

弟善隨

晉

羊琇字稚舒景獻皇后從父弟也父耽官至太常兄瑾

尚書右僕射琇少舉郡計參鎮西鍾會軍事從平蜀及
會謀反琇正言苦諫還賜爵關內侯琇涉學有智算少
與武帝通門甚相親狎每接筵同席嘗謂帝曰若富貴
見用任領護各十年帝戲而許之初帝未為太子而聲
論不及弟攸文帝素有代宗之義琇密為武帝畫策甚
有匡救又觀察文帝為政損益揆度應所顧問之事皆
令武帝默而識之後文帝與武帝論當世之務及人間

可否武帝答無不允由是儲位遂定及帝為撫軍命琇
參軍事帝即王位後擢琇為左衛將軍封甘露亭侯帝
踐阼累遷中護軍加散騎常侍琇在職十三年典禁兵
豫機密寵遇甚厚初杜預拜鎮南將軍朝士畢賀皆連
榻而坐琇與裴楷後至曰杜元凱乃復以連榻而坐客
邪遂不坐而去琇性豪侈費用無復齊限而屑炭和作
獸形以溫酒洛下豪貴咸競效之又喜游讌以夜續晝
中外五親無男女之別時人譏之然黨慕勝已其所推

奉便盡心無貳窮窘之徒特能振卹選用多以得意者
居先不盡銓次之理將士有冒官位者為其致節不惜
軀命然放恣犯法每為有司所貸其後司隸校尉劉毅
劾之應至重刑武帝以舊恩直免官而已尋以侯白衣
領護軍頃之復職及齊王攸出鎮也瑋以切諫忤旨左
遷太僕卿既失寵憤怨遂發病以疾篤求退拜特進加
散騎常侍還第卒帝手詔追贈輔國大將軍開府儀同
三司賜東園祕器朝服一襲錢三十萬布百疋諡曰威

王恂字良夫文明皇后之弟也父肅魏蘭陵侯恂文義
通博在朝忠正累遷河南尹建立二學崇明五經鬲令
袁毅嘗餽以駿馬恂不受及毅收受貨者皆被貶黜焉
魏氏給公卿已下租牛客戶數各有差自後小民憚役
多樂為之貴勢之門動有百數又太原諸部亦以匈奴
胡人為之田客多者數千武帝即位詔禁募客恂明峻
其防所部莫敢犯者咸寧四年卒贈車騎將軍恂弟虔
字恭祖以功幹見稱累遷衛尉封安壽亭侯拜平東將

軍假節監青州諸軍事徵為光祿勳轉尚書卒子士文
嗣歷右衛將軍南中郎將鎮許昌為劉聰所害虔弟愷
字君夫少有才力歷位清顯雖無細行有在公之稱以
討楊駿勲封山都縣公邑千八百戶遷龍驤將軍領驍
衛將軍加散騎常侍尋坐事免官起為射聲校尉久之
轉後將軍愷既世族國戚性復豪侈用赤石脂泥壁石
崇以愷將為鴆毒之事司隸校尉傅祗劾之有司皆論
正重罪詔特原之由是衆人僉畏愷故敢肆其意所欲

之事無所顧憚焉及卒諡曰醜

楊文宗武元皇后父也其先仕漢四世爲三公文宗爲
魏通事郎襲封務亭侯早卒以后父追贈車騎將軍諡
曰穆

羊元之惠皇后父尚書右僕射瑾之子也元之初爲尚
書郎以后父拜光祿大夫特進散騎常侍更封興晉侯
遷尚書右僕射加侍中進爵爲公成都王穎之攻長沙
王乂也以討元之爲名遂憂懼而卒追贈車騎將軍開

府儀同三司

虞豫元敬皇后父也少有美稱州郡禮辟並不就拜南陽王文學早卒明帝即位追贈散騎常侍驃騎大將軍開府儀同三司平山縣侯子允嗣允敬后弟也初拜散騎常侍遷步兵校尉太寧末追贈豫官以允襲封爵轉右衛將軍與南頓王宗俱為明帝所昵並典禁兵及帝不豫宗以陰謀發覺事連允帝隱忍不問徙允為宗正卿加散騎常侍咸和二年宗伏誅左遷允為桂陽太守

秩中二千石頻徙琅邪廬陵太守咸康元年卒追贈衛將軍加散騎常侍子洪襲爵

庾琛字子美明穆皇后父也兄袞在孝友傳琛永嘉初為建威將軍過江為會稽太守徵為丞相諮議祭酒卒官以后父追贈左將軍妻母丘氏追封鄉君子亮陳先志不受咸和中成帝又下詔追贈琛驃騎將軍儀同三司亮又辭焉亮在列傳

杜乂字弘理成恭皇后父也祖鎮南將軍預父尚書左

丞相錫乂性純和，美姿容，有盛名於江左。王羲之見而目之曰：「膚若凝脂，眼如點漆。」此神仙人也。桓彝亦曰：「衛玠神清，杜乂形清。」襲封當陽侯，為丹陽丞，早卒，無男生。后而乂終，妻裴氏嫠居，養后以禮，自防甚有德音。咸康初，追贈乂金紫光祿大夫，封裴氏為高安鄉君。邑五百戶。至孝武帝時，崇進為廣德縣君。裴氏壽考，百姓號曰杜姥。初，司徒蔡謨甚器重乂，嘗言於朝曰：「恨諸君不見杜乂也，其為名流所重如此。」

褚裒字季野康獻皇后父也祖碧有局量以幹用稱嘗
為縣吏事有不合令欲鞭之碧曰物各有所施榱椽之
材不合以為藩落也願明府垂察乃捨之家貧辭吏年
垂五十鎮南將軍羊祜與之有舊言於武帝始被升用
官至安東將軍父洽武昌太守裒少有簡貴之風與京
兆杜乂俱有盛名冠於中興譙國桓彝見而目之曰季
野有皮裏陽秋言其外無臧否而內有所褒貶也謝安
亦雅重之常云裒雖不言而四時之氣亦備矣初辟西

陽王掾吳王文學蘇峻之構逆也車騎將軍郗鑒以裒
為參軍峻平以功封都鄉亭侯稍遷司徒從事中郎除
給事黃門侍郎康帝為琅邪王將納妃妙選素望詔聘
裒女為妃於是出為豫章太守及康帝即位徵拜侍中
遷尚書以后父苦求外出除建威將軍江州刺史鎮半
洲在官清約雖居方伯恒使私僮樵採項之徵為衛將
軍領中書令裒以中書銓管詔命不宜以姻戚居之固
讓詔以為左將軍兗州刺史都督兗州徐州之琅邪諸

軍事假節鎮金城又領琅邪內史初裒總角詣庾亮亮使郭璞筮之卦成璞駭然亮曰有不祥乎璞曰此非人臣卦不知此年少何以乃表斯祥二十年后吾言方驗及此二十九年而康獻皇太后臨朝有司以裒皇太后父議加不臣之禮拜侍中衛將軍錄尚書事持節都督刺史如故裒以近戚懼獲譏嫌上疏固請居藩於是改授都督徐兗青揚州之晉陵吳國諸軍事衛將軍徐兗二州刺史假節鎮京口永和初復徵裒將以為揚州錄

尚書事吏部尚書劉遐說裒曰會稽王令德國之周公也足下宜以大政付之裒長史王胡之亦勸焉於是固辭歸藩朝野咸歎服之進號征北大將軍開府儀同三司固辭開府裒又以政道在於得才宜委賢任能升進舊齒乃薦前光祿大夫顧和侍中殷浩疏奏即以和為尚書令浩為揚州刺史及石虎死裒上表請伐之即日戒嚴直指泗口朝議以裒事任貴重不宜深入可先遣偏師裒重陳前所遣前鋒督護王頤之等徑造彭城示

以威信後遣督護廉疑進軍下邳賊即奔潰疑率所領據其城池今宜速發以成聲勢於是除征討大都督徐克青揚豫五州諸軍事裒率衆三萬徑進彭城河朔士庶歸降者日以千計裒撫納之甚得其歡心先遣督護徐龕伐沛獲僞相支重郡中二千餘人歸降魯郡山有五百餘家亦建議請援裒遣龕領銳卒三千迎之龕違裒節度軍次代陂為石遵將李萇所敗死傷大半龕執節不撓為賊所害裒以春秋責帥授任失所威畧虧損

上疏自貶以征北將軍行事求留鎮廣陵詔以偏師之

責不應引咎逋寇未殄方鎮任重不宜貶降使還鎮江

口解征討都督時石虎新死其國大亂遺戶二十萬口

渡河將歸順乞師救援會裒已旋威勢不接莫能自拔

皆爲慕容皝及苻健之衆所掠死亡咸盡裒以遠圖不

就憂慨發疾及至京口聞哭聲甚衆裒問何哭之多左

右曰代陂之役也裒益慚恨永和五年卒年四十七遠

近嗟悼吏士哀慕之贈侍中太傅本官如故諡曰元穆

子歆字幼安以學行知名歷散騎常侍祕書監

何準字幼道穆章皇后父也高尚寡欲弱冠知名州府
交辟不就兄充爲驃騎將軍勸其令仕準曰第五之名
何減驃騎準兄弟中第五故有此言充居宰輔之重權
傾一時準散帶衡門不及人事唯誦佛經修營塔廟而
已徵拜散騎侍郎不起年四十七卒升平元年追贈金
紫光祿大夫封晉興縣侯子愔以父素行高潔表讓不
受三子放惔澄放繼充惔官至南康太守早卒愔子元

度西陽太守次叔度太常卿尚書澄字季元起家祕書郎轉丞清正有器望累遷祕書監太常中護軍孝武帝深愛之以為冠軍將軍吳國內史太元末琅邪王出居外第妙選師傅徵拜尚書領琅邪王師安帝即位遷尚書左僕射典選王師如故時澄以脚疾固讓特聽不朝坐家視事又領本州大中正及桓玄執政以疾奏免卒於家安帝反正追贈金紫光祿大夫長子籍早卒次子融元熙中為大司農

王濛字仲祖哀靖皇后父也曾祖黯歷位尚書祖佑北
軍中侯父訥新淦令濛少時放縱不羈不為鄉曲所齒
晚節克己勵行有風流美譽虛已應物恕而後行莫不
敬愛焉事諸母甚謹奉祿資產常推厚居薄喜愠不形
於色不脩小潔而以清約見稱善隸書美姿容嘗覽鏡
自照稱其父字曰王文開生如此兒邪居貧帽敗自入
市買之嫗悅其貌遺以新帽時人以為達與沛國劉惔
齊名友善惔嘗稱濛性至通而自然有節濛每云劉君

知我勝我自知時人以惔方荀奉倩濛比袁曜卿凡稱
風流者舉濛惔為宗焉司徒王導辟為掾導復引匡術
弟孝濛致賤於導曰開國承家小人勿用公仗德義以
尹天下方將澄清彞倫崇重名器夫軍國殊用文武異
容豈可令涇渭混流虧清穆之風何以允答具瞻儀刑
海內導不答後出補長山令復為司徒左西屬濛以此
職有譴則應受杖固辭詔為停罰猶不就徙中書郎簡
文帝之為會稽王也嘗與孫綽商畧諸風流人綽言劉

惔清蔚簡令王濛溫潤恬和桓溫高爽邁出謝尚清易
令達而濛性和暢能言理辭簡而有會及簡文帝輔政
益貴幸之與劉惔號為入室之賓轉司徒左長史晚求
爲東陽不許及濛病乃恨不用之濛聞之曰人言會稽
王癡竟癡也疾漸篤於燈下轉麈尾視之歎曰如此人
曾不得四十年也年三十九卒臨殯劉惔以犀杷麈尾
置棺中因慟絕久之謝安亦嘗稱美濛云王長史語甚
不多可謂有令音有二子脩蘊脩字敬仁小字荀子明

秀有美稱善隸書號曰流弈清舉年十二作賢全論濛以示劉惔曰敬仁此論便足以參微言起家著作郎琅邪王文學轉中軍司馬未拜而卒年四十二臨終歎曰無媿古人年與之齊矣

王遐字桓子簡順皇后父驃騎將軍述之從叔也少以華族仕至光祿勳寧康初追贈特進光祿大夫加散騎常侍諡曰靖長子恪領軍將軍恪子欣之豫章太守秩中二千石欣之弟懽之廣州刺史遐少子臻崇德衛尉

王蘊字叔仁孝武定皇后父司徒左長史濛之子也起家著作郎累遷尚書吏部郎性平和不抑寒素每一官缺求者十輩蘊無所是非時簡文帝為會稽王輔政蘊輒連狀白之曰某人有地某人有材務存進退各隨其方故不得者無怨焉補吳興太守甚有德政屬郡荒人飢輒開倉贍卹主簿執諫請先列表上待報蘊曰今百姓嗷然路有飢饉若表上須報何以救將死之命乎專輒之愆罪在太守且行仁義而敗無所恨也於是大賑

貸之賴蘊全者十七八焉朝廷以違科免蘊官士庶詣
闕訟之詔特左降晉陵太守復有惠化百姓歌之定后
立以后父遷光祿大夫領五兵尚書本州大中正封建
昌縣侯蘊以恩澤賜爵非三代令典固辭不受朝廷敦
勸終不肯拜乃授都督京口諸軍事左將軍徐州刺史
假節復固讓謝安謂蘊曰卿居后父之重不應妄自菲
薄以虧時遇宜依褚公故事但令在貴權於事不事耳
可暫臨此任以紓國恩之重於是乃受命鎮于京口頃

之徵拜尚書左僕射將軍如故遷丹陽尹即本軍號加散騎常侍蘊以姻戚不欲在內苦求外出復以為都督浙江東五郡鎮軍將軍會稽內史常侍如故蘊素嗜酒末年尤甚及在會稽畧少醒日然猶以和簡為百姓所悅時王悅來拜墓蘊子恭往省之素相善遂留十餘日方還蘊問其故恭曰與阿太語蟬連不得歸蘊曰恐阿太非汝之友阿太悅小字也後竟乖初好時以為知人太元九年卒年五十五追贈左光祿大夫開府儀同三

司長子華早卒次子恭在列傳恭弟爽字季明彊正有志力歷給事黃門侍郎侍中孝武帝崩王國寶夜欲開門入為遺詔爽距之曰大行晏駕皇太子未至敢入者斬乃止爽嘗與會稽王道子飲道子醉呼爽為小子爽曰亡祖長史與簡文皇帝為布衣之交亡姑亡姊伉儷二宮何小子之有及國寶執權免爽官後兄恭再起事並以爽為寧朔將軍參預國事恭敗被誅

褚爽字弘茂小字期生恭思皇后父也祖裒父歆爽少

有令稱謝安甚重之嘗曰若期生不佳我不復論士矣
為義興太守早卒以后父追贈金紫光祿大夫爽子秀
之淡之裕之義熙中並歷大官宗史有傳

後魏

賀訥代人道武皇帝之舅獻明后之兄也其先世為君
長四方附國有數十部祖紇始有勲於國尚平文女父
野干尚昭成女遼西公主及昭成崩諸部乖亂獻明后
與道武及衛秦二王往依訥會苻堅使劉庫仁分攝國

事於是道武還居獨孤部訥總攝東部為大人遷居大
寧行其恩信衆多歸之盛於庫仁苻堅假訥鷹揚將軍
後劉顯謀逆道武輕騎歸訥訥見而驚喜拜曰官家復
國之後當念老臣帝笑曰誠如舅言要不忘也訥中弟
染干麤暴忌帝常圖為逆每為皇姑遼西公主擁護故
染干不得肆其禍焉諸部大人請訥兄弟求舉道武為
主染干曰在我國中何得爾也訥曰大國興復先業於
我國中我國之福也遂與諸大人勸進道武登代王位

于牛川及帝討吐突隣部訥兄弟遂懷異圖率諸部救之帝擊之大潰訥西遷衛辰遣子直力鞬征訥訥告急請降道武簡精騎二十萬救之遂徙訥部落及諸弟處之東偏訥又通於慕容垂垂以訥為歸善王染干謀殺訥而代立訥遂與染干相攻垂遣子麟討之敗染干於牛都破訥於赤城道武遣師救訥麟乃引退訥從道武平中原拜安遠將軍其後離散諸部分土定居不聽遷徙其君長大人皆同編戶訥以元舅稍見尊重然無所

統領以壽終於家訥弟盧亦從平中原以功賜爵遼西
公帝遣盧會衛王儀伐鄴而盧自以帝之季舅不肯受
儀節度帝遣使切責之盧遂憤恨與儀司馬丁建構成
其嫌彌加猜忌會道武勅儀去鄴盧亦引歸道武以盧
為廣川太守盧性雄豪耻居冀州刺史王輔下襲殺輔
奔慕容德德以為并州刺史廣寧王廣固敗盧亦沒訥
從父弟悅初道武之居賀蘭部也人情未甚附唯悅舉
部隨從又密為帝祈禱天神請成大業出於誠至帝嘉

之甚見寵待後平中原以功賜爵鉅鹿縣侯進爵北新
公卒子泥襲爵後降為肥如侯道武崩京師草草泥出
舉烽於安陽城北賀蘭部人皆往赴之明元即位乃罷
詔泥與元渾等八人拾遺左右與北新侯安同持節行
并定二州劾奏并州刺史元六頭等皆伏罪州郡肅然
後從太武征赫連昌以功進爵為琅邪公軍國大事並
參預焉又征蠕蠕為別道將坐逐賊不進詐增虜級當
斬贖為庶人久之拜光祿勳為外都大官復本爵卒官

子醜建襲

姚黃眉姚興之子明元昭哀皇后之弟也姚泓滅黃眉
間來歸魏明元厚禮待之賜爵隴西公尚陽翟公主拜
駙馬都尉隸戶二百太武即位遷內都大官後拜太常
卿卒贈雍州刺史隴西王諡曰獻陪葬金陵黃眉寬和
溫厚希言得失太武悼惜之故贈禮有加焉

杜超字祖仁魏郡鄴人密皇后之兄也少有節操泰恒
中為相州別駕始光中太武思念舅氏以超為陽平公

尙南安長公主拜駙馬都尉位大鴻臚卿車駕幸其第
賞賜巨萬神麋三年以超行征南大將軍太宰進爵為
王鎮鄴追加超父豹鎮東大將軍陽平景王母曰鉅鹿
惠君真君五年超為帳下所害太武臨其喪哀慟久之
謚曰威王長子道生賜爵城陽侯後為秦州刺史進爵
河東公道生弟鳳皇襲超爵侍中特進太武追思超不
已欲以鳳皇為定州刺史鳳皇不願違離闕庭乃止鳳
皇弟道雋賜爵發干侯鎮枋頭除兗州刺史超既薨復

授超從弟遺侍中安南將軍開府相州刺史入為內都
大官進爵廣平王遺性忠厚頻歷州郡所在著稱薨贈
太傅諡曰宣王長子元寶位司空元寶弟允寶司隸校
尉元寶又進爵京兆王及歸而父遺喪明當入謝元寶
欲以表聞文成未知遺薨怪其不至召之元寶將入時
人止之曰宜以家憂勿往元寶欲見其寵不從遂冒哀
而入未幾以謀反伏誅親從皆斬唯元寶子世衡逃免
時朝議欲追削超爵位中書令高允上表理之後克州

故吏汲宗等以道雋遺惠在人前從坐削爵受誅委骸
土壤求得收葬書奏詔義而聽之贈散騎常侍安南將
軍南康公諡曰昭世衝襲遺公爵

賀迷代人太武敬哀皇后之從父也皇后生景穆初后
少孤父兄近親唯迷故蒙賜爵長鄉子卒贈光祿大夫
五原公

閭毗代人蠕蠕主大檀之親屬太武時自其國來降毗
即恭皇后之兄也后生文成文成大安二年以毗為平

北將軍賜爵河東公弟紇為寧北將軍賜爵零陵公其
年並加侍中進爵為王毗征東將軍評尚書事紇征西
將軍中都大官自餘子弟賜爵為王者二人公五人侯
六人子三人同時受拜所以隆宗舅氏和平二年追謚
后祖父延定襄康公父辰定襄懿王毗薨贈太尉追贈
毗妻河東王妃子惠襲紇薨贈司空子豆後賜名莊太
和中初立三長以莊為定戶籍大使甚有時譽十六年
例降爵後為七兵尚書卒紇弟染位外都大官冀州刺

史江夏公卒先是文成以乳母常氏有保護功既即尊位尊為保太后後尊為皇太后興安二年太后前兄英字世華自肥如令超為散騎常侍鎮軍大將軍賜爵遼西公弟喜鎮軍大將軍祠曹尚書帶方公三妹皆封縣君妹夫王睹為平州刺史遼東公追贈英祖父苻堅扶風太守亥為鎮西將軍遼西簡公父渤海太守澄為侍中征東大將軍太宰遼西獻王英母許氏博陵郡公遣兼太常盧度世持節改葬獻王於遼西樹碑立廟置守

冢百家太安初英為侍中征東大將軍太宰進爵為王
喜左光祿大夫改封燕郡從兄訢為安東將軍朝鮮侯
訢子伯夫散騎常侍選部尚書次子員金部尚書喜子
振太子庶子三年英領太師評尚書事內都大官伏寶
泰等州刺史五年詔以太后母宋氏為遼西王太妃和
平元年喜為洛州刺史初英事宋不能謹而睹奉宋甚
至就食於和龍無車牛宋疲不能進睹買宋於笈至是
宋於英等薄不如睹之篤謂太后曰何不王睹而黜英

太后曰英為長兄門戶主也家內小小不順何足追計
睹雖盡力故是他姓奈何在英上本州郡公亦足報矣
天安中英為平州刺史訢為幽州刺史伯夫進爵范陽
公英濁貨徙敦煌諸常自興安至是皆以親疏受爵賜
田宅時為隆盛後伯夫為洛州刺史以贓污欺妄徵斬
於京都承明元年徵英復官薨謚遼西平王始英之徵
也夢日墜其所居黃山下水中村人以牛車挽致不能
出英獨抱載而歸聞者異之後員與伯夫子禽可共為

飛書誣謗朝政事發有司執憲刑及五族孝文以文明
太后故罪止一門訖年老赦免歸家恕其孫一人扶養
又給奴婢田宅其家僮没入者百人金錦布帛數萬計
賜尚書已下宿衛已上其女壻及親從在朝皆免歸本
鄉十一年孝文文明太后以文昭太后故悉出其家前
後没入子女以喜子振試守正平郡卒

馮熙字晉昌長樂信都人文明太后之兄也祖弘北燕
主太武平遼海熙父朗內徙官至秦雍二州刺史遼西

郡公坐事誅文明太后臨朝追贈假黃鉞太宰燕宣王
立廟長安熙生於長安為姚氏魏母所養以叔父樂陵
公邈因戰入蠕蠕魏母攜熙逃避至氐羗中撫育年十
一好弓馬有勇幹氐羗皆歸附之魏母惡其如此將還
長安始就博士學問從師授孝經論語好陰陽兵法事
及長游華陰河東二郡間性汎愛不拘小節人無士庶
來則納之取人子女為奴婢有容色者幸之為妾有子
女數十人號為貪縱文明太后既貴使人訪知熙所在

徵赴京師拜冠軍將軍賜爵肥如侯尚景穆女博陵長
公主拜駙馬都尉出為定州刺史進爵昌黎王獻文即
位遷太傅累拜內都大官孝文即位文明太后臨朝王
公貴人登進者衆帝乃承旨以熙為侍中太師中書監
領祕書事熙以頻履師傅又中宮之寵為羣情所駭心
不自安乞轉外任文明太后亦以為然於是除車騎大
將軍開府都督洛州刺史餘如故洛陽雖經破亂而舊
三字石經宛然猶在至熙與常伯夫相繼為州廢毀分

用大至頽落熙為政不能仁厚而崇佛法自出家財在諸州鎮建圖精舍七十二處寫十六部一切經延致名德沙門日與講論精勤不倦所費亦不貲而所營塔寺多在高山秀阜傷殺人牛有沙門勸止之熙曰成就之後人唯見佛圖焉豈知殺人牛也其北芒寺碑文中書侍郎賈元壽之辭孝文頽登北芒寺親讀碑文稱為嘉作熙求入朝授內都大官太師如故熙事魏母孝謹如事所生魏母卒乃散髮徒跣水漿不入口三日詔不聽

服熙表求依趙氏之孤帝以熙情難奪聽服齊衰期後以例降改封京兆郡公帝納其女為后曰白虎通云王所不臣數有三焉妻之父母抑言其一此所謂供承宗廟不欲奪私心然吾孝著於春秋無臣證於往牒既許通體之一用開至尊之敬比長秋配極陰政既敷未聞有司陳奏斯式可詔太師輒從臣禮又勅集書造儀付外孝文前後納熙三女二為后一為昭儀由是馮氏寵貴益厚賞賜累鉅萬帝每詔熙上書不臣入朝不拜熙

上書如舊熙於後遇疾綿寢四載詔遣醫問道路相望
車駕亦數臨幸焉將遷洛帝親與熙別見其困篤歔歔
流涕密勅宕昌公主曰太師萬一不幸即可監護喪事
十九年薨於代車駕在淮南留臺表聞還至徐州乃舉
哀為制總服詔有司豫辦凶儀并開魏京之墓令公主
之柩俱向伊洛凡所營送皆公家為備又勅代都給綵
帛前後六千匹以供凶用皇后詣都赴哭太子恂亦赴
代哭及將葬贈黃鉞侍中都督十州諸軍事大司馬太

尉冀州刺史加黃屋左纁備九錫前後部羽葆鼓吹皆
依晉太宰安平獻王故事有司奏諡詔曰可以威彊恢
遠曰武奉諡於公柩至洛七里澗帝服縗往迎叩靈悲
慟而拜焉葬日送臨墓所親作銘誌主生二子誕脩誕
字思正脩字寶業皆姿質妍麗年財十餘文明太后俱
引入禁中申以教誡然不能習讀經史兄弟並無學術
徒整飾儀容寬雅恭謹而已誕與孝文同歲幼侍書學
仍蒙親待尚帝妹樂安長公主拜駙馬都尉侍中征西

大將軍南平王脩侍中鎮北大將軍尚書東平公又除
誕儀曹尚書知殿中事及罷庶姓王誕為侍中都督中
外諸軍事中軍將軍特進改封長樂郡公誕拜官孝文
立於庭遙受其拜既訖還室脩降為侯誕脩雖並長宮
禁而性趣乖別誕性淳篤脩乃浮競誕亦未能誨督其
過然時言於太后孝文嚴責之至於捶楚由是陰懷毒
恨遂結左右有憾於誕者求藥欲因食害誕事覺帝自
詰之具得情狀誕引過謝乞全脩命帝以誕父老又重

其意不致於法撻之百餘黜為平城百姓脩妻司空穆
亮女也求離婚請免官帝引管蔡事皆不許帝寵誕仍
陰與同輿而載同案而食同席坐卧彭城王勰北海王
詳雖直禁中然親近不及十六年以誕為司徒帝既愛
誕除官日親為制三讓表并啟將拜又為其章謝尋加
車騎大將軍太子太師十八年帝謂其無師傅獎導風
誕深自誨責從駕南伐十九年至鍾離誕遇疾不能侍
從帝日省問醫藥備加帝銳意臨江乃命六軍發鍾離

南轅與誕泣訣左右皆莫不掩涕時誕已愀然彊坐視
帝悲而淚不能下言夢太後來呼臣帝鳴咽執手而出
遂行是日去鍾離五十里許昏時告誕薨問帝哀不
自勝時崔慧景裴叔業軍在中淮去所次不過百里帝
乃輕駕西還從者數千人夜至誕薨所拊尸哀慟若喪
至戚達旦聲淚不絕從者亦迭舉音帝以所服衣帽充
襚親自臨視徹樂去膳宣勅六軍止臨江之駕帝親北
渡慟哭極哀喪至洛陽車駕猶在鍾離詔留守賜賻物

布帛五千匹穀五千斛以供葬事贈假黃鉞使持節大
司馬領司徒侍中都督太師駙馬公如故加以殊禮備
錫九命依晉大司馬齊王攸故事有司奏諡詔曰案諡
法主善行德曰元柔克有光曰懿昔貞惠兼美受二諡
之榮忠武雙徽賜兩號之茂式準前訓宜契具瞻既自
少綢繆知之惟朕案行定名可諡曰元懿帝又親為作
碑文及挽歌詞皆窮美盡哀事過其厚車駕還京遂親
至誕墓停車而哭使彭城王勰詔羣官脫朱衣服單衣

介憤而哭司徒貴者示以朋友微者示如寮佐公主貞
厚有禮度產二男長子穆字孝和襲熙爵避皇子愉封
改封扶風郡公尚孝文女順陽長公主拜駙馬都尉歷
員外通直散騎常侍穆與叔輔興不和輔興亡贈相州
刺史祖載在庭而穆方高車良馬恭受職命言宴滿堂
忻笑自若為御史中尉東平王匡所劾後位金紫光祿
大夫遇害河陰贈司空雍州刺史子罔字景昭襲爵昌
黎王尋以庶姓罷王仍襲扶風郡公子峭字子漢齊受

禪例降穆弟顥襲父誕長樂郡公脩弟聿字寶興廢皇
后同產兄也位黃門郎信都伯後坐妹廢免為長樂百
姓宣武時卒於河南尹聿同產弟風幼養於宮文明太
后特加愛念數歲賜爵至北平王拜太子中庶子出入
禁闥寵侔二兄孝文親政後恩寵稍衰降爵為侯幽后
立乃復叙用后死亦宥散卒贈青州刺史崔光之無黃
門也與聿俱直光每謂之曰君家富貴太盛終必衰敗
聿云我家何負四海乃咒我也光云以古推之不可不

慎時熙為太保誕司徒太子太傅脩侍中尚書聿黃門
廢后在位禮愛未弛是後歲餘脩以罪棄熙誕喪亡后
廢聿退時人以為盛必衰也

李惠中山人思皇后之父也父蓋少知名歷位殿中都
官尚書左將軍南郡公初太武妹武威長公主故涼王
沮渠牧犍之妻太武平涼州頗以公主通密計之助故
寵遇差隆詔蓋尚焉蓋妻興氏以是而出是後蓋加侍
中駙馬都尉殿中都官尚書右僕射卒官贈征南大將

軍定州刺史中山王諡曰壯惠弱冠襲父爵妻襄城王
韓頽女生二女長即后也惠歷位散騎常侍侍中征西
大將軍秦益二州刺史進爵為王轉雍州刺史征南大
將軍加長安鎮大將惠長於思察雍州聽事有驚爭巢
鬪已累日惠令人掩獲試命網紀斷之並辭惠乃使卒
以弱竹彈兩鷺既而一去一留惠笑謂吏屬曰此留者
自計為巢功重彼去者既經楚痛理無固心羣下伏其
深察人有負鹽負薪者同釋重擔息樹陰二人將行爭

一羊皮各言籍背之物惠遣爭者出顧州綱紀曰此羊皮可拷知主乎羣下咸無答者惠令人置羊皮席上以杖擊之見少鹽屑曰得其實矣使爭者視之負薪者乃伏而就罪凡所察究多如此類由是吏人莫敢欺犯後為開府儀同三司青州刺史王如故歷政有美績惠素為文明太后所忌誣惠將南叛誅之惠二弟初樂與惠諸子同戮後妻梁氏亦死青州盡沒其家財惠本無爵故天下冤惜之惠從弟鳳為定州刺史長樂王主簿後

長樂以罪賜死時卜筮者河間邢瓚辭引鳳云長樂不軌鳳為謀主伏誅唯鳳弟道念及兄弟之子皆逃免後遇赦乃出太和十二年孝文將爵舅氏詔訪存者而惠諸從以再離孥戮難於應命唯道念敢先詣闕乃由后妹及鳳兄弟子女之存者於是賜鳳子屯爵栢人侯安祖浮陽侯興祖安喜侯道念貞定侯從弟寄生高邑子皆加將軍十五年安祖昆弟四人以外戚蒙見詔謂曰卿之先世内外有犯得罪於時然官必用材以親非興

邦之選外氏之寵超於末葉從今已後自非奇才不復
得外戚謬班抽舉既無殊能今且可還後例降爵安祖
等改侯為伯並去軍號帝奉馮氏過厚於李氏過薄舅
家了無叙用朝野人士所以竊議太常高閭顯言於禁
中及宣武寵隆外家並居顯位乃惟孝文舅氏存已不
霑恩澤景明末特詔興祖為中山太守正始初詔追崇
惠為使持節驃騎將軍開府儀同三司定州刺史中山
公太常奏諡上言案諡法武而不遂曰壯諡曰壯公興

祖自中山遷燕州刺史卒以兄安祖子侃晞為後襲先
封南郡王後以庶姓罷王改為博陵郡公侃晞為莊帝
所親幸拜散騎常侍嘗食典御帝之圖爾朱榮侃晞與
魯安等持刃於禁內殺榮及莊帝蒙塵侃晞奔梁

高肇字首文文昭皇太后之兄也自云本渤海脩人五
世祖顧晉永嘉中避亂入高麗父颺字法脩孝文初與
弟乘信及其鄉人韓內異富等入魏拜厲威將軍河間
子乘信明威將軍俱待以客禮遂納颺女是為文昭皇

后生宣武颺卒景明初宣武追思舅氏徵肇兄弟等錄
尚書事北海王詳等奏颺宜贈左光祿大夫賜爵渤海
公諡曰敬其妻蓋氏宜追封清河郡君詔可又詔颺嫡
孫猛襲渤海公爵封肇平原公肇弟顯澄城郡公三人
同日受封始宣武未與舅氏相接將拜爵乃賜衣幘引
見肇顯于華林都亭皆甚惶懼舉動失儀數日之間貴
富赫奕是年咸陽王禧誅財物珍寶奴婢田宅多入高
氏未幾肇遂為尚書右僕射冀州大中正尚宣武姑高

平公主遷尚書令領吏部肇出自夷土時望輕之及在
位居要留心百揆孜孜無倦世咸謂之為能宣武初六
輔專政後以咸陽王禧無事構逆由是遂委信於肇肇
既無親族頗結朋黨附之者旬月超昇背之者陷以大
罪以北海王詳位居其上構殺之又說宣武防衛諸王
殆同囚禁時順皇后暴崩世言肇為之皇子昌薨僉謂
王顯失於醫療承肇意旨及京兆王愉出為冀州刺史
畏肇恣擅遂至不軌肇又譖殺彭城王勰由是朝野側

目咸畏惡之因此專權與奪任已又嘗與清河王懌於

雲龍門外廡下忽忿諍大至紛紜太尉高陽王雍和止

之高后既立愈見寵信肇既當衡軸每事任已本無學

識動違禮度好改先朝舊制減削封秩抑黜勲人由是

怨聲盈路矣延昌初遷司徒雖貴登台鼎猶以去要快

快形於辭色衆咸嗤笑之父兄封贈雖久竟不改瘞三

年乃詔令遷葬肇不自臨赴唯遣其兄子猛改服詣代

遷葬於鄉時人以肇無識哂而不責也及大舉征蜀以

肇為大將軍都督諸軍為之節度與都督甄琛等二十餘人俱面辭宣武於東堂親奉規畧是日肇所乘驄馬停於神虎門外無故驚倒轉卧渠中鞞具瓦解衆咸怪異肇出惡焉四年宣武崩赦罷征軍明帝與肇及征南將軍元遙等書稱諱言以告凶問肇承變非唯仰慕亦憂身禍朝夕悲泣至於羸悴將至宿瀍澗驛亭家人夜迎省皆不相視直至闕下衰服號哭還昇太極殿奉喪盡哀太尉高陽王先居西栢堂專決庶事與領軍于忠

密欲除之潛備壯士直寢邢豹伊盆生等十餘人於舍人省下聲哭梓宮訖於百官前引入西廊清河王懌任城王澄及諸王等皆竊言目之聲入省壯士搯而拉殺之下詔暴其罪惡稱為自盡自餘親黨悉無追問削除職爵葬以士禮逮昏乃於廁門出其尸歸家初聲西征行至函谷車軸中折從者皆以為不獲吉還也靈太后臨朝令特贈營州刺史永熙二年孝武帝贈使持節侍中中外諸軍事太師大丞相太尉公錄尚書事冀州刺

史肇子植自中書侍郎為濟州刺史率州兵討破元愉
別將有功當蒙封賞不受云家荷重恩為國致効是其
常節何足以膺進陟之報懇惻發於至誠歷青相朔恒
四州刺史卒植頻蒞五州皆以清能著稱當時號為良
刺史贈安北將軍冀州刺史肇長兄琨早卒襲颺封渤海
郡公贈都督五州諸軍事鎮東大將軍冀州刺史詔
其子猛嗣猛字豹兒尚長樂公主即宣武同母妹也拜
駙馬都尉歷位中書令出為雍州刺史有能名入為殿

中尚書卒贈司空冀州刺史孝武帝時復贈太師大丞相錄尚書事公主無子猛先在外有男不敢令主知臨終方言之年幾三十矣乃召為喪主尋卒無後琨弟偃字仲游太和十年卒正始中贈安東將軍都督青州刺史諡曰莊侯景明四年宣武納其女為貴嬪及于順皇后崩永平元年立為皇后二年八坐奏封后母王氏為武邑郡君偃弟壽早卒壽弟即肇也肇弟顯侍中高麗國大中正早卒

胡國珍字世玉安定臨涇人也祖略姚興勃海公姚達
平北府諮議參軍父深赫連屈丐給事黃門侍郎太武
克統萬深以降款之功賜爵武始侯後拜河州刺史國
珍少好學雅尚清儉太和十五年襲爵例降為伯女以
選入掖庭生明帝即靈太后也孝明帝踐阼以國珍為
光祿大夫靈太后臨朝加侍中封安定郡公追崇國珍
妻皇甫氏為京兆郡君置守冢十戶尚書令任城王澄
奏安定公宜出入禁中參諮大務詔屈公入決萬機尋

進位中書監儀同三司侍中如故賜絹歲八百疋妻梁
四百疋男女姊妹各有差國珍與太師高陽王雍太傅
清河王懌太保廣平王懷入居門下同釐庶政詔依漢
車千秋晉安平王故事給步挽一乘自掖門至于宣光
殿得以出入并備几杖後與侍中崔光俱授帝經侍直
禁中國珍上表陳刑政之宜詔皆施行熙平中加國珍
使持節都督雍州刺史驃騎大將軍開府靈太后以國
珍年老不欲令其在外且欲示以方面之榮竟不行遷

司徒公侍中如故就宅拜之靈太后明帝率百寮幸其第宴會極歡又追尊京兆郡君為秦太上君太上君景明三年薨於洛陽於此十六年矣太后以太上君墳瘞卑局更增廣為起塋域門闕碑表侍中崔光等奏按漢高祖母始諡曰昭靈夫人後為昭靈后薄太后母曰靈文夫人皆置園邑三百家長丞奉守今秦太上君未有尊諡陵寢孤立即秦君名宜上終稱無設埽衛以慰情典請上尊諡曰孝穆權置園邑三十戶立長丞奉守太

后從之封國珍繼室梁氏為趙平郡君元乂妻拜為女
侍中封新平郡君又從封馮翊君國珍子祥妻長安縣
公主即清河王懌女也國珍年雖篤老而雅敬佛法時
事潔齋自禮拜至於出入侍從猶能跨馬據鞍神龜元
年四月七日步從所建佛像發第至閭闔門四五里八
日又立觀像晚乃肯坐勞熱增甚因遂寢疾靈太后親
侍藥膳十二日薨年八十給東園溫明祕器五時朝服
各一具衣一襲贈布三千匹錢一百萬蠟千斤大鴻臚

持節監護喪事太后還宮成服於九龍殿遂居九龍寢
室明帝服小功服舉哀於太極東堂又詔自始薨至七
七皆為設千僧齋齋令七人出家百日設萬人齋二七
人出家先是巫覡言將有凶勸令為厭勝法國珍拒而
不從云吉凶有定分唯脩德以禳之臨死與太后訣云
母子善臨天下殷勤至於再三又及其子祥云我唯有
一子死後勿如比來以威抑之靈太后以其好戲時加
威訓國珍故以為言始國珍欲就祖父西葬舊鄉後緣

前世諸胡多在洛葬有終洛之心崔光嘗對太后前問國珍云國公萬年後為在此安厝為歸長安國珍言當陪葬天子山陵及病危太后請以後事竟言還安定語遂愔忽太后問清河王懌與崔光等議去留懌等皆以病亂請從先言太后猶記崔光昔與國珍言遂營墓於洛陽太后雖外從衆議而深追臨終之語云我公之遠慕二親亦吾之思父母也追崇假黃鉞使持節侍中相國都督中外諸軍事太師領太尉公司州牧制號太上

秦公加九錫葬以殊禮給九旒鑾輅虎賁班劍百人前
後部羽葆鼓吹輜輶車諡曰文宣公賜物三千段粟一
千五百石又詔贈國珍祖父父兄下逮從子皆有封職
持節就安定監護喪事靈太后迎太上君神柩還第與
國珍俱葬贈祔一與國珍同及國珍神主入廟詔太常
權給以軒縣之樂六佾之舞初國珍無男養兄真子僧
洗為後後納趙平君生子祥字元吉襲封故事世襲例
皆減邑唯祥獨得全封趙平君薨給東園祕器明帝服

小功服舉哀於東堂靈太后服齊衰期葬於太上君墓
左不得祔合祥歷位殿中尚書中書監侍中改封平涼
郡公薨贈開府儀同三司雍州刺史諡曰孝景僧洗字
湛輝封爰德縣公位中書監侍中改封濮陽郡公僧洗
自永安後廢棄不預朝政天平四年薨詔給東園祕器
贈太師太尉公錄尚書事雍州刺史諡曰孝真長子寧
字惠歸襲國珍先爵改為臨涇伯後進為公歷岐涇二
州刺史卒諡曰孝穆女為清河王亶妃生孝靜皇帝武

定初贈太師太尉公錄尚書事諡曰孝昭子虔字僧敬
元乂之廢靈太后虔時為千牛備身與備身張車渠等
謀乂事發乂殺車渠等虔坐遠徙靈太后反政徵為吏
部郎中太后好以家人禮與親族宴戲虔嘗致諫由是
後宴譴多不預焉出為涇州刺史封安陽縣侯興和三
年以帝元舅超遷司空公薨贈太傅太尉公尚書僕射
徐州刺史諡曰宣葬日百官會葬乘輿送於郭外子長
榮仕齊累遷章武太守為政清靜頗得民和除兼并省

尚書左丞當官正色無所迴避尚書左僕射趙彥深密
勿樞要中書舍人裴澤便蕃左右以殿門受拜皆彈糾
之彥深等頗有恨言長粲不以介意後主踐阼長粲被
勅與黃門馮子琮出入禁中專典敷奏武成還鄴後主
在晉陽長粲仍受委留後後主從武成還鄴仍勅在京
省判度支尚書監議五禮武成崩與領軍婁定遠錄尚
書趙彥深左僕射和士開高文遙領軍綦連猛高阿那
肱僕射唐邕同知朝政時人號為八貴於後定遠文遙

並出唐邕專典外兵綦連猛阿那肱別總武任長絜常在左右無宣詔令從幸晉陽後主富於春秋庶事皆相歸委長絜盡心毗奉甚得名譽又正為侍中丁母憂給假馳驛奔喪尋有詔起復前任隴東王長仁心欲入處機要之地為執政不許長仁疑長絜通謀大以為恨遂言於太后發其陰私請出為州太后為言於後主後主不得已從焉除趙州刺史及辭長絜眷戀流涕後主亦憫然慰勉之至州存心政事為吏民所懷因沐髮手不

得舉失瘖卒後主聞而傷悼在朝文武嗟嘆咸惜之贈
司空公尚書左僕射瀛州刺史諡文貞公長絜性溫雅
在官清潔但始居要密便為子叔泉取清河崔德儉女
為妻在晉陽處分用妻弟王逖與德儉對為司徒主簿
時論以此譏之又性好內有一侍婢其妻王驕妬手刺
殺之為此忿恨數年不相見親表為之語曰自我不見
于今三年後納妾李氏又與王別宅亦無朝拜之禮嫠
婦公孫氏已殺三夫長絜不信彊取之令與李氏同住

未期而亡子仲操位陳留太守次叔泉通直散騎侍郎
先是望氣者上言太白食昴法當大赦和士開奏聞詔
降罪人以應之尚書左僕射徐之才諳練往事語士開
曰天垂象見吉凶有成災者有不成災者案昴趙分或
可趙地有災古者王侯各在封邑故分野有災當其君
長今吾等虛名竟不之國刺史專令一境善惡所歸比
來多以刺史為驗未幾而長祭死焉寧弟盛字歸興位
左衛將軍賜爵江陽男歷幽瀛二州刺史為政清靜民

吏懷之轉冀州刺史卒贈司徒公錄尚書事定州刺史
追封陽平郡公諡曰懿穆明帝後納其女為皇太后舅
皇甫集妻集字元會一字文都安定朝那人封涇陽縣
公位儀同三司雍州刺史右衛大將軍贈侍中司空公
諡曰靜集弟度字文亮封安縣公累遷尚書左僕射領
左衛將軍度頑蔽每與人言自稱僕射時人方之毛嘉
正光初元乂出之為都督瀛州刺史度不願出頻表固
辭乃除右光祿大夫孝昌元年為司空領軍將軍加侍

中元乂之見出也恐朝夕誅滅度與妻陳氏多納其貨
為之左右度無子養兄集子子熙為子子熙嫂趙郡太
守裴他女他還京師度問他外何消息他曰行路所聞
唯道明公多取元乂金帛遠近無不慨歎公宜戮此罪
人以謝天下陳氏聞而惡之又攝吏部事選司徒兼尚
書令不拜尋轉太尉孜孜營利老而彌甚遷授之際皆
自請乞靈太后知其無用以舅氏難違之然所歷官最
為貪蠹爾朱榮入洛西奔兄子華州刺史邕尋與邕為

人所殺

楊騰弘農人文帝之舅也父貴琅邪郡守封華陰男騰妹為京兆王愉妃故騰得處貴游景明初襲爵後為襄城太守甚有聲稱文帝即位開府儀同三司出鎮河東亮贈司空雍州刺史諡曰貞襄子盛

乙弗繪河南洛陽人文帝皇后之兄也文帝即位開府儀同三司侍中中書監魏昌縣公又為吏部尚書

北齊

趙猛太安狄鄆人也姊為文穆皇帝繼室生趙郡公琛
猛性方直頗有器幹齊神武舉義以預義勲封信都縣
伯累遷南營州刺史卒贈司空公

胡長仁字孝隆安定臨涇人武成皇后長兄也父延之
魏中書令兗州刺史太寧中贈司空公長仁以內戚歷
位尚書左僕射尚書令及武成崩參預朝政封隴東郡
王左丞鄺孝裕郎中陸仁惠盧元亮厚相結託長仁每
上省孝裕必方駕而來省務既繁簿案堆積令史欲諮

郡坐者日有百數孝裕屏人私請朝退亦相隨仁惠元亮又伺閑而往停斷公事人號為三佞長仁私游友密處處追尋孝裕勸其求進和士開深疾之於是除孝裕為章武郡守元亮為淮南郡守仁惠為幽州長史孝裕又說長仁曰王陽卧疾和士開必來王因而殺之入見太后不過百日失官便代其處士開知其謀更徙孝裕為北營州建德郡守長仁每干執事求為領軍將相文武以主上富於春秋母后家不可專政故抑而不許以

本官攝選長仁性好威福意猶未盡先是尚書胡長粲奏事內省長仁疑粲間已苦請太后出之天統五年從駕自并還鄴夜發滏口帝以夜漏尚早停於路傍長仁後來謂是從行諸貴遂遣門客程牙馳驛呼問帝遣中尚食陳德信問是何人牙不答而走帝命左右追射之既而捉獲因令壯士撲之決馬鞭二百牙一宿便死士開因此遂令德信列長仁倚親驕豪無畏憚由是除齊州刺史及辭於昭陽列仗引見長仁不敢發語唯泣涕

橫流到任啟求暫歸所司不為奏長仁怨憤謀令冀州人李揩牆刺和士開其弟長咸告之士開密與祖孝徵議之孝徵引漢文帝殺薄昭為故事於是勅遣張固劉桃枝馳驛詣齊州責長仁謀害宰輔遂賜死先是太白食昂占者曰昂為趙分不利胡王長仁未幾死長仁性好歌舞飲酒至數斗不亂自至齊州每進酒後必長嘆歔歔流涕不自勝左右莫不怪之尋而後主納長仁女為后重加贈長仁子君璧襲爵隴東王君璧弟君璋及

長仁弟長雍等前後七人並賜爵合門貴盛后廢後稍
稍黜退焉

隋

高祖外家呂氏其族蓋微平齊之後求訪不知所在至
開皇初濟南郡上言有男子呂永吉自稱有姑字苦桃
嫁為楊忠妻勘驗知是舅子始追贈外祖雙周為上柱
國太尉八州諸軍事青州刺史封齊郡公諡曰敬外祖
母姚氏為齊敬公夫人詔並改葬於齊州立廟置守冢

以永吉襲爵留在京師及大業中授上黨郡太守性識庸劣職務不理後去官不知所終永吉從父道貴性尤頑駭言詞陋鄙初自鄉里徵入長安上見之悲泣道貴畧無戚容但連呼帝名云種未定不可偷大似苦桃姊後以數犯忌諱動致違忤上甚耻之乃命高頻厚加供給不許接對朝士拜上儀同出為濟南太守令即之任斷其入朝道貴還至本郡頗自崇重每與人言自稱皇舅數將儀衛出入閭里從故人游宴庶僚咸苦之後郡

廢終於家子孫無聞焉

獨孤羅字羅仁雲中人也其先為部落大人父信周大宗伯衛國公自有傳初信隨魏孝武入關中羅遂為高氏所囚及信為宇文護所誅羅始見釋寓居中山孤貧無以自給齊將獨孤永業以宗族故哀之為買田宅遺以資蓄信入關後復娶二妻郭氏生子六人善穆藏順隋整崔氏生高祖獻皇后及齊亡高祖為定州總管獻皇后遣人求羅得之相見悲不自勝侍御者皆泣於是

厚遺車馬財物未幾周武帝以羅功臣子久淪異域徵拜楚安郡太守以疾去官歸京師諸弟見羅少長貧賤每輕侮不以兄禮事之羅性長者亦不與諸弟校競長短后由是重之高帝為丞相拜羅儀同嘗置左右既受禪詔追贈羅父其諸弟以羅母沒齊先無夫人號不當承襲上以問后后曰羅誠嫡長不可誣也於是襲爵趙國公以其弟善為河內郡公穆為金泉縣公藏為虎牢縣公陟為武喜縣公整為千牛備身擢拜羅為左領將

軍遷左衛將軍前後賞賜不可勝計出為涼州總管進位上柱國徵拜左武衛大將軍煬帝嗣位改封蜀國公未幾卒官諡曰恭子纂嗣位河陽都尉纂弟武都大業末為河陽都尉庶長子開遠字文化及之弑逆也裴虔通率賊入成象殿宿衛兵士皆從逆開遠時為千牛與獨孤盛力戰閣下為賊所執賊義而捨之善字伏阼幼聰慧善騎射以父勲封魏寧縣公魏廢帝元年又以父勲授驃騎大將軍開府儀同三司加侍中進爵長城郡

公周孝閔帝踐阼除河州刺史以父負累久廢於家保定三年乃授龍州刺史天和六年襲爵河內郡公從帝東征以功授上開府尋除兗州刺史政在簡惠百姓安之卒於州贈使持節柱國五州諸軍事定州刺史子覽嗣位右候衛大將軍大業末卒隋字黎邪仕周胥附上士坐父徙蜀十餘年宇文護誅始歸長安其外祖母高氏先事猫鬼已殺其舅郭沙羅因轉入其家上微聞而不信會獻皇后及楊素妻鄭氏俱有疾召醫視之皆曰

此猫鬼疾上以阼后之異母弟阼妻楊素之異母妹由是意阼所為陰令其兄左監門郎將穆以情喻之上又遣左右諷阼阼言無有上不悅左轉遷州刺史出怨言上令左僕射高潁納言蘇威大理正皇甫孝緒大理丞楊遠等雜按之阼婢徐阿尼言本從阼母家來常事猫鬼每以子日夜祀之言子者鼠也其猫鬼每殺人所死家財物潛移於畜猫鬼家阼嘗從家中索酒其妻曰無錢可酤阼因謂阿尼曰可令猫鬼向越公家使我足錢

阿尼便咒之居數日猫鬼向素家後上初從并州還陁於園中謂阿尼曰可令猫鬼向皇后所使多賜吾物阿尼復咒之遂入宮中楊遠乃於門下外省遣阿尼呼猫鬼阿尼於是夜中置香粥一盆以匙扣而呼曰猫女可來無住宮中久之阿尼色正青若被牽拽者云猫鬼已至上以其事下公卿奇章公牛弘曰祇由人興殺其人可以絕矣上令犢車載陁夫妻將賜死於其家陁弟司勳侍中整詣闕求哀於是免陁死除名以其妻楊氏為

尼先是有人訟其母為人猫鬼所殺者上以為祆妄怒而遣之及此詔誅被訟行猫鬼家阤未幾而卒煬帝即位追念舅氏聽以禮葬乃下詔贈正議大夫帝意猶不已復贈銀青光祿大夫二子延福延壽阤弟整莅幽州刺史大業初贈金紫光祿大夫平鄉侯



通志卷一百六十五



總校官庶吉士臣侍朝

校對官庶吉士臣陳文樞

謄錄監生臣勵世馨